

NIRA LIDERI PROJEKT: DANI ANTIFAŠIZMA U TUZLI 2019

– Tarik Smajlović i Mirnes Ćerimović - Univerzitet u Tuzli –

TPO Fondacija je, u okviru Nira Lideri projekta, nakon četverodnevno treninga za lični i profesionalni razvoj, studentima i studenticama Univerziteta u Tuzli i Univerziteta u Zenici, dodijelila pet grantova za najbolje projektne prijedloge. Jedan od tih najboljih projektnih prijedloga jeste projekt "Dani antifašizma u Tuzli 2019" koji su potpisali Tarik Smajlović i Mirnes Ćerimović. Projekt je sufinansiran i od strane grada Tuzle.

Projekt je realiziran tokom mjeseca septembra 2019.

ODRŽANE AKTIVNOSTI:

Aktivnost 1. Izrada grafita na temu antifašizma. Grafit je crtan 14. i 15. septembra 2019 na zgradi Narodnog pozorišta Tuzla, uz saglasnost uprave Narodnog pozorišta. Autor grafita je Kerim Hodžić iz Sarajeva. Na zidu na kojem se nalazi grafit, bile su ispisane uvredljive i fašističke izjave te je bio zapušten. Ovom akcijom je zid uređen, prekrečen i napravljena je lokacija na kojoj mladi mogu da koriste zid kao pozadinu svojih fotografija, a i okoliš izgleda mnogo prijemčivije.

Aktivnost 2. Snimanje kratkog dokumentarnog filma. U filmu su zabilježeni kadrovi iz projektnih aktivnosti, te je popraćen sa tekstom i izjavama koordinatora, predavača, panelista i učesnika. Značaj ovog uratka jeste u tome da će se koristiti za sljedeće manifestacije na temu antifašizma te će, online objavom, biti dostupan široj javnosti i doprinosti promociji antifašizma.

Za gledanje filma, <https://youtu.be/ve35V2AwhuY>.

Aktivnost 3. Radionica "Antifašizam i aktivizam" održana 20.9.2019. Educirano je 10 mladih sa područja Tuzlanskog kantona u uzrastu od 15 do 30 godina. Amela Jusufović je prenijela znanje i upoznala mlade sa pojmovima, nastankom i borbama protiv fašizma, te o nastanku, tekovini i važnosti njegovanja antifašizma. Radionica je imala još jednu pozitivnu stranu a to je uspostavljanje suradnje između Omladinskog pokreta Revolt i Saveza antifašista iz narodnooslobodilačkog rata Tuzlanskog kantona.

Aktivnost 4. Ulična akcija. Ista podrazumijeva učešće matičnih organizacija u podjeli promo materijala. Akcija je održana 29.9.2019. na platou "Kod Ismeta i Meše" te na Trgu Slobode, gdje su dijeljene brošure, cegeri, bedževe i stikere sa porukama antifašizma. Ulična akcija se odvijala u periodu održavanja protesta protiv klimatskih promjena a koje je organizovao Omladinski pokret Revolt te u periodu "Let's do it" akcije sa porukom da se očisti zemlja u jedan dan. Za čitanje brošure posjetite stranicu:

<http://tpo.ba/pict/news/191129%20NliderAFTz/Dani%20antifaszizma%20u%20Tuzli%202019.pdf>.

Aktivnost 5. Antifa neformalno druženje. Održano u Urban baru 21.9.2019. Ugostili smo mlade antifašiste i zainteresirane građane na roštilj i piće, Razgovarali smo i diskutovali o vrijednostima antifašizma i novim pristupima ovom pojmu.

Aktivnost 6. Javna tribina: (anti)fašizam danas. Održana u Međunarodnoj galeriji portreta u Tuzli 21.9.2019. Panelisti javne tribine su bili Amela Jusufović iz SABNOR TK, Rasim Ibrahimagić iz Sarajevskoh otvorenog centra, Dajana Bakić iz Tuzlanskog otvorenog centra te Elmira Begić kao moderatorica ispred Omladinskog pokreta Revolt. Tribina je ispunila cilj fokusirajući se i približavajući antifašizam mladima. Ono o čemu je diskutirano jeste migrantska kriza, povorka ponosa u Sarajevu, prava manjina i sl. Gosti su imali konkretne primjere i rješenja na postavljena pitanja i temu tribine.

S obzirom da je Bosna i Hercegovina zemlja u kojoj se ne poštuju zakoni i gdje je diskriminacija po bilo kojem osnovu frekventnija od vladavine osnovnih ljudskih prava, projekt "**Dani antifašizma u Tuzli 2019**" je priča vrijedna naše pažnje. Stoga bismo morali, kao društvo u cjelosti a ne samo TPO Fondacija, da obezbjeđujemo više prostora mladima koji ukazuju na anomalije sistema u kojemu žive i koji se aktivno bore protiv istih.